

青春诗会



林 峰(浙江·龙游)

洪泽湖

长堤百里镜中开,浩荡天风湖上来。
 檣挂荷田千载雪,浪奔柳岸一声雷。
 混茫云自心头过,高下鸥从眼底回。
 最爱斜阳红尽处,青山几点似蓬莱。

鹧鸪天·贺宜州民歌手诗词创作会召开

又到梅黄五月天,好将微雨润花笺。
 珍珠墨洒层层绿,玉女歌飞字字圆。
 倾玉液,抚丝弦,宜山韵入上林烟。
 南来更把芬芳赠,再谱新词三百篇。

临江仙·老子山

山下洪波晴外涨,山中秋晚莎深。
 青牛西去恐难寻。红炉香未了,灵洞古灰沉。
 过尽流云天一色,九

皋凤落松阴。丹崖如梦菊如金。太霄闻玉笛,莫负老君心。

何 鹤(北京)

陈永贵墓

雕像巍然雨洗尘,当年风采四时春。
 碑前松影千针翠,阶角履痕一片新。
 莫道重生归梦幻,应知不死是精神。
 他年诸事烟云散,史写虎头山上人。

虎头山三首(录一)

当年往事待重温,小径蜿蜒浮旧痕。
 莫道此山无险势,虎头轻转动乾坤。

张友福(云南·杨林)

监狱诗词一组(录二)

观罪犯年前拨打亲情电话得句
 岁到年关意最沉,亲情一线解愁深。

铁窗寂寂风吹入，不是春天却暖心。

鹧鸪天·岁末寄语服刑人员

影伴铁窗无限悲，年关怅望悔当时。终成恶果痛思痛，已误青春知不知！心若怨，泪休垂；东风一夜转凄其。专诚改造身胎换，明岁新生定可期。

涂运桥(湖北·武汉)

蓦山溪·八公山谒赵大将军廉颇墓

游人无数。谁倚将军墓。独自抚碑歌，看梨花、漫山飞舞。梦回秦赵，营帐共论兵，旗猎猎，草青青，磨剑忘归路。斜阳一缕。襟袖沾红雨。何处可埋忧，徒空听、风中鸟语。寿州城外，把酒祭英雄，千古泪，向天弹，最是春难住。

鹧鸪天·题倚云《柳荫谈词图》

渌水亭边得片闲，临风共对旧江山。柳丝化作情千缕，望眼凝成月半弦。云缥缈，竹孤寒。词坛新境待谁攀。归来犹恨余香绕，魂在盈盈碧浪间。

渠芳慧(江苏·徐州)

登岳阳楼

楼若方舟日夜行，洞庭波撼惧将倾。

湘山已惯浮沉事，木叶不惊荣辱声。
忧乐长从民有意，盛衰原是水多情。
前程此去君休问，凝睇江天正晚晴。

赏崂山绿石(二首)

莹莹一片绿，闻说自崂山。
宜伴风窗读，春深夜月闲。

我有绿嶙峋，相期爱此身。
嶙峋流古朴，梅牖发天真。

方建飞(浙江·平湖)

南乡子·癸巳早春步苏轼《南乡子·重九涵辉楼呈徐君猷》韵

冰雪一时收，草木无声绿远洲。节律初回风未暖，飕飕，送罢残年又岁头。斟酒向谁酬，再把青春待暮秋。世事枯荣浑是梦，休休，阅尽风霜不复愁。

踏莎行·早春

草色侵窗，熏风入户，余寒难奈东君步。野田何处早开花，游蜂已过帘枕去。水暖陂塘，鸭嬉汀渚，绿黄浅染桥前树。千红万紫未当时，新春只在茸萋处。

文金涛(广东·珠海)

梅魂



梅园遥望日曛曛，又见东风摇绿云。
散尽余香春未到，枝头摇落笑东君。

梅影

独坐吟哦夜正清，幽幽月色最多情。
无声剪却梅花影，斜映西窗看到明。

章晓荷(福建·莆田)

苏幕遮

柳烟轻，荷盖满。点点飘萍，都被
无情占。依旧江南春欲烂。红雨凝香，
忍放东君看。月将明，人渐懒。病
酒初醒，几许相思绊。犹恨知交容易
散。旧曲休吹，莫把柔肠绾。

减字木兰花

何当酬诺，物是人非都错错。遍
倚回栏，已是黄昏烟雨寒。等闲
光影，老却朱颜无所定。种甚多情，留
与鸥盟说共鸣。

张超(浙江·杭州)

步杜甫《登楼》韵

烟翠沙白空我心，高楼欲望试登临。
山山寒色历冬夏，树树秋声亘古今。
落木萧萧风袅袅，残荷瑟瑟露侵侵。
岂知明月清入骨，一念不觉愁起吟。

江小敏(浙江经济职业技术学院)

步学杜甫《登楼》

长恨何方惹此心，自他无事未相临。
尘翻鹿跃皆缘昨，浪涌珠沉不照今。
一缕茶烟九天澈，两行慈泪寸毫侵。
从来风雨起无定，不敢妄学渔父吟。

段彪(浙江经济职业技术学院)

咏柳二章

其一

暖日熏风绿更新，垂丝拂面意殷殷。
今朝谁最舞娟娟？烟织湖山又一春。

其二

烟笼西子柳依依，幽步湖堤向翠微。
遥念秦川春色里，倚门双影待谁归？

沈利斌(浙江经济职业技术学院)

地铁

凿地成衢路未谙，何分西北与东南。
飞车一霎苍茫里，如寄人生尘梦酣。

杜甫吟

草堂花落韵悠悠，千载同伤客路愁。
寂寞丹心空对雨，飘零白发独登楼。
兵戈海内诗成史，离乱人间涕似流。
杖策归来凭醉笔，孤吟声荡一孤舟。
注：《对雨》、《登楼》，杜甫诗篇名。